

Alpinism ladin te la Dolomites

Menacrepes da la Ladinia protagonisc de na lingia de evenc a Poza per recordèr Tita Piaz tel 70° cedeàn da la mort

Evenc - L'era i 8 de aost del 1948 canche Tita Piaz, l "Diaol de la Dolomites", dò aer passà via ogne sort de pericoi sui crepes, fenla sia vita te n banal azident con la roda te sie paise, a Pera.

Tel 70° cedeàn l'è stat pissà na lingia de scomenzadives per l recordèr. Te Piaz del Comun de Sèn Jan, entornvia la gran statua de Tita Piaz fata da Egidio Petri e enaudèda da Sèn Nicolò, ai 6 de deamber del 2017 (e che zachei volessa fèr portèr via Pera), l Comitad Manifestazions de Poza à logà na lingia de tulins, con retrac e pensiero su Tita Piaz e su etres protagonisc de la storia de l'alpinism ladin te la Dolomites. Apede chest, via per dut istà de lunesc sera te sala del Consei de Comun vegn metù a jir scontrèdes con menacrepes, scritores e esper che porta dant vigniun n desferent tassell de la gran storia di rampeadores te nosc raion che se lea con Tita Piaz.

L program, rencurà da la presidenta del Comitad Manifestazions de Poza Mara Dorich ensema con la giornalista e esperta de alpinism Virna Pierobon, à portà te Fascia te l'ultima doi scontrèdes "Ra Schirates" de Ampez e l menacrep Ivo Rabanser da Gherdena, che à rejonà dedant a na sala piena de jent, tant del post che da foravia.

Da Ampez per prejentèr Dibona e Dimai

L'è stat l'assessor a la cultura del Comun de Sèn Jan Simone Zulian, en lunesc ai 9 de messèl, a prejentèr i 3 componenc de "Ra Schirates" rué a Poza. Regolé col maion checen che à fat la storia de chest glorious grop alpinistich, con l dessegn de la schieratola doventà oramai n simbol de Cortina, l president Alberto Gaspari ensema con Carlo Gandini e Franco Gaspari è rué a prejentèr sie grop, ma ence a rejonèr de doi di maores alpinisc ampezegn, Angelo Dibona e Antonio Dimai. L grop de Ra Schirates è nasciù l prim de messèl del 1939 da 10 joegn pascioné de jir a crepes e ades l dombra 83 comembres, anter chisc 7 eles. Anter si obietives no l'è tant chel de jir a "conquistèr" la pontes, ma de les descorig e les fèr cognoscer a la jent, valorisan l'alpinism te ogne vers. Apontin te chest chèder te Fascia i à



Dedant al Comun de Sèn Jan, apede a la statua de Tita Piaz, na lingia de tulins porta dant retrac e pensiero su l'alpinism te la Dolomites.

portà dant materiai de gran enteress, che l Grop à podù enjignèr e dèr fora soraldut de gra a la documentazion e al lurier de Carlo Gandini.

Se à podù veder n bel filmat su Angelo Dibona, realisà jai 10 egn, olache se cognosc l maor menacrep de Ampez ence travers i recorè de compagne desche Lino Lacedelli, e amò l'è stat rejonà de Dibona e de Antonio Dimai, pèr de na dinastia de menacrepes, protagonisc ence de doi libes de Gandini dac fora dal grop de Ra Schirates.

I amisc ampezegn à serà sù la scontrèda te Fascia con na gran marevea: na lingia de retrac "stereoscopics" realisè da Charles Lefébure te la Dolomites jai 100 egn, che vardé con i veières aposta i dèsc l'efet tridimensionèl: na bela curiosità aprijèda da duc.

Ivo Rabanser à rejonà de Emilio Comici

L lunesc dò, ai 16 de messèl, l'è stat Mara Dorich a prejentèr l ghest ladin ruà da Sènta Crestina: l menacrep e academich del CAI Ivo Rabanser.

Con gran competenza e capazità de rejonèr, l component di Catores de Gherdena che amò joenet à tacà a rampinèr sul Saslonch, ge à fat cognoscer a dut l public che empienia la sala n auter protagonist de la storia de l'alpinism che l'era stat pecont de Tita Piaz: Emilio Comici.

Nasciù a Trieste del 1901, Comici

l'è tacà sia attività ti cougoi carsics de sia tera e de 30 egn l'è restà encantà da la Ciuita, l gran crep ampezan. L se à tramudà a Misurina, l'è rampeà sul Vaiiolet, olache del 1932 l'è cognosciù Tita Piaz, e sie inom l'è restà leà soraldut a la via su la torn grana de Lavaredo, averta del 1933 con i frèdes Dimai de Ampez e dapò fata endò da Comici da soul del '37: una de la gran classiches de la Dolomites che amò anchecondi è cognosciuda a livel internazionèl desche "via Comici".

Rabanser à rejonà ence del carater de Comici, n om sensibol e mingol malinconich, n "creatif" che no chieria la via più sorida ma chela più bela e da ardiment, ma ence n fi de sie temp, l temp del fascism che conscidrèa l'alpinism na "scola de italich ardiment" e donca n om che vardèa con spirit de orgolie nazional a la conquista di crepes che no era amò stac arjone. Del '38 l se à tramudà te Gherdena olache l doventà podestà de Selva e Santa Crestina, ma l'è restà na persona sorida, che se à fat benvoler da la jent. L'è mort de 40 egn, a cauja de n cordin che se à crepà, e dò sia mort l regim ge à dat la medaa de òr per meric sportives.

I etres apuntamenc

La lingia de scontrèdes de Dolomites Alpinism Ladin en onor de Tita Piaz se aea avert con la neza del "Diaol de la Dolomites" Mariangela Bruneri e con l scrittor Alfredo Paluselli, che à prejentà si liber "Il Diavolo generoso" (che vegn prejentà ence en lunesc ai 23 da les 5 domesdi te l'aperitif al Museo Ladin). En lunesc ai 23 se jirà inant col scrittor da mont Francesco Vidotto e ai 30 se podarà veder l film "Oltre il confine. La storia di Ettore Castiglioni". Se jirà inant ai 6 de aost con Piero Badaloni, ai 13 con Giancarlo Pavan e ai 20 con Andrea Bianchi, per fenir con protagonisc fascegn: i Ciamorces, ritadins de Piaz, ai 27 de aost e Attilio Dantone che ai 3 de setember rejonarà del Nepal, olache el era endèna l gran teremot e l'è vivù na esperienza che no l desmentiarà mai più.

Lucia Gross



Alberto Gaspari, Carlo Gandini e Franco Gaspari de Ra Schirates de Ampez è rué te Fascia a prejentèr la fegures de Angelo Dibona e Antonio Dimai.